

S. TOSSO EPISCOPVS AVGVSTANVS.



**S**anctus Tosso literarum & uirtutum egregius cultor extitit. Accedebat etiam singularis facundia, qua animi sui cogitata commode proponere poterat. Itaque in Vualtenhouen Parrochus constitutus fuit. Eo in loco cum optimè præesset, atque finitimorum concursu Euangelium prædicaret, post S. Viterbi mortem, omnium consensu Episcopus Augustanus electus fuit. Hanc uocationem pio animo suscepit, & prudentia rara administrauit. Cum autem ijs in locis S. Mango habitaret, eum frequenter accessit, atque de rebus Ecclesiæ cum eo contulit, anno Christi circiter septingentesimo octuagesimo quinto. Tandem cum an-

nis quindecim suam Ecclesiam optimè administrasset, terrenam uitā reliquit, & æternam gloriam intrauit. In eius locum S. Simpertus electus, ipse uero sanctorum catalogo annumeratus fuit. Anon. in Augustan. Episcop.